

Naqqiut**Akissuteqaat 20. maj 2024-meersoq taarserpaa**

(Immikkoortup pingajussaanneernejarnissaanut allannguutissatut siunnersuummik saqqummiussinissaq siunnersuutigineqarpoq)

Uunga siunnersuut: Najukkani aatsitassanut tunngasunik suliaqarnerit pillugit Inatsisartut inatsisaat

(Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

Akissuteqaat

(Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

Aappassaaneernejarnera

Inuussutissarsiornermut Aatsitassanullu Ataatsimiititaliaq inatsisissatut siunnersuut sukumiisumik suliarimmassuk aammalu inassuteqaatinik kaammattuutinillu arlalinnik imaqartumik isumaliutissiissuteqarnerannut, Naalakkersuisut qutsavigaat.

Naalakkersuisut maluginiarpaat, siunnersuummi aalajangersakkat arlallit nalunaarutinik atuutilersitsinikkut erseqqissarneqarnissaat, ataatsimiititaliap inassutigigaa. Naalakkersuisut taamatut isummorsoneq isumaqatigaa.

Nalillit pisinnaatitaanani nunatsinniit annissorneqartarnissaat aarlerinaateqannginnerulersinniarlugu, Naalakkersuisut nakkutiginninnermut oqartussat piginnaatitaanerannik annertusititsinissaq siunissami sulissutigissagaat, ataatsimiititaliap kaammattuutigaa. Taamatut kaammattuuteqarneq Naalakkersuisut suliaqarnerup ingerlaqqinnerani ilanngutissavaat.

Ingerlatassaq saliiinissamut 250.000 koruuninit annertunerungitsutut, Naalakkersuisut aatsitassarsiorluni suliaqarneq inatsisissatut siunnersuummi nassuiarpaat. Ataatsimiititaliap siunnersuutigaa taamatut aningaasartaliilluni killiliinermi assartuussinermut aningaasartuutit ilaatinneqassanngitsut, tassami assartuussinermut aningaasartuutit ingerlatassamiit ingerlatassamut assigiinngitsorujussuusinnaammata. Taamaattumik Naalakkersuisut allannguutissatut siunnersuummik saqqummiussippot, taanna malillugu matusinermut aningaasartuutissanut 250.000 koruuniusuni assartuussinermut aningaasartuutit ilaatinneqassanatik.

Tamatuma saniatigut aatsitassat qinngornernik ulorianartunik akullit pillugit siunnersuummi aalajangersakkat erseqqissarneqarput, taamaalilluni ersarissumik allassimalerluni, aatsitassat qinngornernik ulorianartunik akullit uranimut inatsimmi pineqartunut ilaasut, tassani pineqartut. Taannalu allannguutissatut siunnersuut Ataatsimiititaliap kissaateqarnera malillugu pivoq.

Inatsisissatut siunnersuummi § 5-imi aalajangersarneqarpoq, aalajangersimasumik najugaqartut ukiuni tallimani nunatsinniissimasut kisimik, inuussutissarsiornissaq siunnerfigalugu aatsitassanik katersisinnaasut. Piumasaqaammut tassunga immikkut ittumik akuersissuteqarnissamut periarfissaqartitsisoqarpoq. § 7, imm. 5-imi allassimavoq, inuk aalajangersimasumik najugaqartuunngitsoq, inuup nunatsinnut atassuteqarnerata nalilernerqarnera malillugu aalajangersimasumik najugaqartutut isigineqarsinnaasoq, Naalakkersuisut qinnuteqartoqarneratigut aalajangersinnaavaat, tassani ilaavoq inuk ilinniarnini pissutigalugu imaluunniit assigisaannik pissuteqartumik Kalaallit Nunaata avataaniissimasoq. Ataatsimiititaliap Naalakkersuisut allannguutissatut siunnersuummik saqqummiussinissamik kaammattorpai, taamaalilluni inatsisip oqaasertaanni toqqaannartumik allassimassalluni, kalaallit nunami allamiikkallarsimasut, atassuteqarnissamut piumasaqaammi pineqartunut ilaatinneqassanngitsut. Naalakkersuisut pingajussaanneerinissamut allannguutissatut siunnersuummik saqqummiussissapput, taamaalilluni immikkut ittumik akuersissuteqarnissamut periarfissaqarneq inatsisip oqaasertaanni siusinnerusukkut innersuussutigineqassalluni, tamatumunngalu periarfissaqarneq ersarinnerusumik allassimassalluni.

Kiisalu atortussanut akuersissuteqartarneq pillugu atugassarititaasut pillugit siunnersuummi § 32-imi inatsisip oqaasertaanni kukkusumik innersuussineq Naalakkersuisut iluarsivaat.

Naalakkersuisut taamatut oqaaseqarlutik, allannguutissatut siunnersuutip imarisai allannguutissat akuerineqarnissaat siunertaralugu, siunnersuut aappassaaneerneqartussanngortippaat.